

Augsburg, 21. Januar/7. Februar 1565

An Johannes Oporinus

UB Basel, Fr. Gr. I 11, fol. 277r.

Steinmann Nr. 767.

Lit.: Husner S. 160 (mit Auszug).

S. P. D. Literas postremas abs te accepi, Oporine humanissime, 22 Octobris datas, et per eundem tabellarium rescripsi, qui se certò literas ad te curaturum, pollicebatur. Sed quia vereor, ne casu aliquo illae interciderint (et quid mirum perire literas? cum eodem anno duo tabellarij nobis perierint) paucis responsum meum repetam. Querebaris nec gratiam tibi relatam pro Chalcondylis dedicatione, et plus à te exigi, quām datum esset. Vt autem et gratia tibi referretur, et nihil à te iniqui postularetur, curae vt esset D. Carino, sedulò egi, et eius tibi literas satis esse facturas spero, quas illa prima quaque occasione ad te mittetur. Nam per subitum discessum huius tabellarij Tubingam ituri et Argentinam, illum conuenire non potui. De meis lucubrationibus oύδε γρὺ te scribere, quas tamen recognoscendi autor mihi fuisti, eò minus miror, quod inchoata pridem opera confici, magis tua intersit. Quod cum intelligere mihi viderer, vsus instituto meo, ab eo tempore nec Isocratem nec Demosthenem τυπογραφικῶς vnquam aspexi. Qui si a vobis, vel viuente vel mortuo Wolfio, vt antea, parum emendati fuerint editi: οὐ φροντὶς ἵπποκλείδῃ. Sed tamen, si vixero, temerariae editionis paenitebit.

Sed haec tuo arbitratu, quod in me quidem situm fuerit, agentur. Heruagium (quod vtinam falsò asseratur) si obissse verum est, etiam atque etiam abs te peto, vt Basilij opus, tua fide impetratum, Cos. Hainzelij et mea, illi missum, prima et certissima quaque occasione hoc remittendum cures. Sin prius certò non potueris: saltem ex nondinis.

De D. Villingero nihil tibi polliceri possum, ac potius, si ita tecum agetur, vti mecum actum est, δεήσει χάριν μὲν ἔχειν ἀντὶ τῶν δεδομένων, συγγνώμην δὲ ἀντὶ τῶν παραλειμμένων. Obstitit nobis calamitas temporum, quo minus matura et emendata editione gratiam iniremus. Suidas à me accepit tantum 10, cum ego 20 offerrem. Reliquos ego retinui, vt iussisti, et habeo reliquos aliquot, vt proximè scripsi, liberalitate tua meam expectationem superante.

Chalcondylae 48 mihi redditii sunt. De his vendidi 27. senis +. qui faciunt f. 2. +. 42. quos tibi in nondinas mittam. Restant libelli 21. quos vel tibi remittam, vel cui bibliopolae iusseris, dabo. Incertum enim est, an à me distrahi possint, ob incertum statum rerum mearum, et scholae nostrae sordes.

Plura scribere ante acceptas abs te literas non potero. Illud vnum testor, etsi nihil magis opto quām legendi ocium, per me tamen non staturum, quo minus Isocrates et Demosthenes opera mea et castigatiores et commentariolis illustrati edantur. Materiam praeparatam habeo: restat νοῦς ὁ διακοσμήσων. Te, Mi D. Oporine, et valere et σιεὶ ἀριστεύειν καὶ ὑπέροχον ἔμμεναι ἄλλων ex animo precor. Vale. Augustae Vindelicorum 21 Ianuarij 1565.

Hiero[nymus] Wolfius
Tuus.

Xylander Cedrenum breui vt opinor absolutum huc mittet. Iterum vale. 7 Februarij.